

VAŽNOST VAKCINACIJE PROTIV COVID-19 ZA ZDRAVSTVENE RADNIKE

- osnovne informacije -

Poštovane kolegice i kolege zdravstveni radnici,

Nijedna javno zdravstvena mjera kao vakcinacija nema toliku dugu historiju znanja, istraživanja, dokaza i potvrđenih rezultata u zaštiti zdravlja. Vakcinacija predstavlja jedno od najvećih medicinskih dostignuća 20. vijeka, koje godišnje spašava 2 do 3 miliona ljudskih života u svijetu.

Pandemija COVID-19 pokrenula je globalni odgovor – izradu velikog broja vakcina koje stoje na raspolaganju zemljama. Do sada je oko 50 zemalja već počelo sa vakcinacijom u skladu sa nacionalnim programima vakcinacije, pri čemu prioritete predstavljaju osobe koje su posebno izložene riziku od koronavirusa SARS-CoV-2, a zatim postepeno ostale grupe stanovništva.

Sve vrste vakcina protiv COVID-19 su namjenjena postizanju istog optimalnog cilja – dobrog kolektivnog imuniteta populacije na poželjnih 60-79%, čime se jačaju mogućnosti postepenog vraćanja normalnom. Kako je to proces, nesumnjivo da će koronavirus još neko vrijeme određivati naš život. Cilj svih nas u zdravstvenom sistemu je da sačuvamo zdravlje ljudi osiguranjem dostupnosti dovoljno vakcina protiv COVID-19 i obuhvatom vakcinacijom što većeg broja ljudi do postizanja kolektivnog imuniteta, koji će nam omogućiti da možemo živjeti sa koronavirusom na isti način kao i s drugim virusnim bolestima.

ZDRAVSTVENI RADNICI SU POD POVEĆANIM RIZIKOM OD OBOLJEVANJA

Zdravstveni radnici su na prvoj liniji borbe protiv pandemije COVID-19. Posebno su ugroženi zdravstveni radnici koji rade na pružanju zdravstvene njege teško oboljelim od COVID-19. Također nije zanemariv ni rizik od daljeg prenosa sa zdravstvenih radnika na njihove najbliže i ostatak populacije.

VAKCINACIJA ZDRAVSTVENIH RADNIKA ŠTITI ZDRAVSTVENI SISTEM

Kada se razboli neko od zdravstvenih radnika nije u mogućnosti da radi i pruža ključne usluge pacijentima. Kontinuirana zaštita zdravstvenih radnika od infekcije je od vrhovnog prioriteta zbog toga što je jasno da su zdravstveni radnici izloženi povećanom riziku od obolijevanja od COVID-19, a imaju ključnu ulogu u pružanju njege drugima.

Najraniji pristup vakcinama je od ključnog značaja za obezbjeđenje zdravlja i sigurnosti zdravstvenih radnika kao i njihovih pacijenata, porodica i šireg zdravlja stanovništva.

VAKCINACIJA ZDRAVSTVENIH RADNIKA POMAŽE U SMANJENJU ŠIRENJA COVID-19 MEĐU PACIJENTIMA

Zdravstveni radnici koji obole od COVID-19 mogu zaraziti i osobe kojima pružaju njegu, pacijente, hospitalizirane pacijente i štićenike u staračkim domovima. Mnoge od ovih osoba su pod povećanim rizikom od smrti izazvane COVID-19. Zdravstveni radnici mogu zaraziti i druge zdravstvene radnike što može ugroziti normalno funkcionisanje zdravstvenog sistema.

KOJI SU RAZLOZI ZA ODBIJANJE VAKCINACIJE?

Dosadašnja iskustva pokazuju da se odbijanje vakcinacije najčešće dešava zbog: nepovjerenja prema nauci i tehnologiji, nepovjerenja u društveni i zdravstveni sistem, uticaja medija i društvenih mreža u širenju dezinformacija o naučnim istraživanjima i dezinterpretaciji naučnih saznanja, kao i globalnog trenda jačanja raznih oblika pseudonauke i nadriljekarstva.

Ne dozvolimo da neznanje, strah i nepovjerenje ovladaju našim izborima i odlukama.

Kada tražimo razloge zašto se ne vakcinisati protiv COVID-19 pokušajmo se prisjetiti slika pandemije COVID-19 širom svijeta, sa milionima zaraženih i skoro dva miliona umrlih od ove bolesti, koja bi vakcinacijom mogla biti spriječena.

Naš zdravstveni sistem omogućuje vakcinaciju kvalitetnim i sigurnim vakcinama protiv COVID-19, u koje trebamo vjerovati.

Vakcinacijom protiv COVID-19 omogućuje se zaštita zdravlja svih nas – *štiteći sebe štitimo i druge!*

ZAVRŠNE PREPORUKE

Pratite isključivo preporuke koje izdaju nadležne zdravstvene institucije i ustanove na području BiH, FBiH i ZDK. Kako biti kontuirano informisan:

- Informacije o cijepljenju, aktualnoj epidemiološkoj situaciji i preporukama na području BiH, FBiH i ZDK možete pronaći na internet stranicama Instituta za zdravlje i sigurnost hrane Zenica (<https://inz.ba/>), kao i Federalnog ministarstva zdravstva (www.fmoh.gov.ba) i Zavoda za javno zdravstvo FBiH (www.zzjzfbih.ba), kao i na internet stranicama Svjetske zdravstvene organizacije (<https://www.who.int/emergencies/diseases/novel-coronavirus-2019/situation-reports/>).

PANIKA NIJE OPCIJA, OPREZ I ODGOVORNOST JESU!

Vaš INZ

(Izvor: Zavod za javno zdravstvo FBiH)